

欽定剿平三省邪匪方略

欽定剿平三省邪匪方略正編卷三百三十四

壬戌年

八月十九日

丁巳

惠齡奏言竊

臣

帶兵趕出子午

峪口正在料理防堵事宜接據探報張二張三

零匪百餘人在沙崖溝雞窩子一帶焚掠滋擾

臣

當卽派令遊擊李得挑帶官兵二百名趕緊

入山並札飭防守紅草河經歷朱點挑派鄉勇

一百名防守石羊關千總王天印挑派官兵一

百名隨同該遊擊前往協力搜剿詎該匪見有官兵卽東竄獨松樹大板岔等處適經畧額勒登保所派之副將吳廷剛等帶領兵勇追剿前往臣復飛飭李得等扼據要隘以便吳廷剛將

該匪截回協力夾擊又據探報太平峪內豬窩子地方有零匪數十人屯聚臣已飛飭通判維

昂帶領鄉勇馳赴該處尋蹤搜捕臣仍督率官

兵在於子午石碓等峪偵探堵截並札飭沿山  
各縣及委員等分段嚴防又據總兵楊芳稟報  
在月亮坪追及斬士黃等賊蹤殺賊五名又於  
小南河囉林內生擒賊目郭士善卽郭三眼子  
其餘生擒十一名殲斃一名滾崖跌斃三名未  
致一名兔脫楊芳仍由大南河進至廟溝探得  
溝腦老林有賊匪數十人屯聚率衆進攻生擒

執旗賊目二名王岱雲王成選殺賊三名活拿  
十三名趕至貫斗溝又擒矛手張正貴李鍾佑  
二名餘賊四散潛逸又接提督慶成來信所派  
守備張進忠帶領兵勇在關西溝搜剿零匪殲  
斃賊匪數人生擒張三之養子張富升等四名  
滾崖跌斃者數名餘賊僅有數人逃散又據臬  
司文需稟報投効武生楊真元等帶領寨勇在

觀音山堵剿河礮擊斃賊匪四名又據護遊擊  
馬世勳稟報在孝義石槽溝化溝等處搜獲苟  
文明夥內餘匪袁起名等四名現已解送經畧  
大營審辦又據督糧道素納稟稱副將應元寬  
進剿苟七麻子賊股百餘人至鐵龍寨溝突遇  
伏賊力戰陣亡並傷亡兵勇數名等語該匪等  
當窮蹙萬分之際尙敢急兔反噬傷害大員實

堪髮指現在額勒登保分派兵勇在山內各路  
跟蹤搜捕諒此敗殘餘孽無難立就殄除奏入  
上命軍機大臣傳諭額勒登保惠齡曰惠齡奏副將  
應元寬追剿苟七麻子賊股百餘人突遇伏賊力  
戰陣亡並傷亡兵勇數名等語南山餘匪不過二  
三百人四散潛竄尙敢逞兇傷害大員實爲可恨  
此皆由帶兵大員因零匪無多心存大意所致看

來此次傷亡兵勇恐尙不止數名况該匪等將副將大員戕害賊勢未免鴟張惠齡當上緊督捕務將苟七麻子一股零匪殲淨擒獲該逆將首級致祭應元寬以慰忠魂至摺內稱張二張三零匪百餘人在沙崖溝一帶焚掠滋擾等語此等零匪經官兵搜剿多日業已勢窮力竭如果不予以暇使之不能裹脅何難悉數殲除乃復任其到處焚掠



不但口食有資且可搶得器械增助賊勢額勒登保如接奉前旨業已前赴楚省則已卽尙未起身亦不必因此留駐陝省當轉飭楊遇春楊芳與總督將軍等督飭鎮將躡探路徑協力搜捕不與賊匪片刻之暇緊躡窮追於奮勇之中持以慎重不可墮賊潛伏山溝抄截官兵詭計以期速就肅清惠齡楊遇春係該省總督提督搜剿餘匪皆伊二

人專責不可因額勒登保赴楚稍存懈弛况惠齡  
前在楚北辦理不妥以致蔓延七載尙不思立功  
自贖耶若再有稽延惟惠齡等是問再副將應元  
寬向來帶兵打仗甚爲出力額勒登保奏報摺內  
屢見其名今以遇伏陣亡實爲可惜著照總兵例  
賜卹其傷亡兵勇並著惠齡查明咨部賜卹

二十三日

辛酉

德楞泰奏言據探報蒲逆等由雲

霧溪竄屯於中蓬子杉樹凹銅錢埡一帶老林  
係馬力難進之路初二日蒲尙佐督同副將馬  
元等帶步隊兵勇由馬鬃嶺火峯巖抄出杉樹  
凹進攻副將鄭啓貴張良槐等帶步隊兵勇由  
火神廟秋木梁繞赴銅錢埡截擊色爾滾達勒  
精西武隆阿督同營總富登阿珠山等帶馬步  
兵勇取道中路大梁黃水池直搗中蓬子均於

四鼓分路進發初三日辰刻色爾滾等先抵中  
蓬子賊衆遙見官兵遠來俱向榆皮扒老林逸  
去聚築戰手佔住銅錢堽山梁依險抗拒馬步  
兵勇趕前奮力仰攻步步進逼斃賊三四十名  
生擒二十餘名賊遂順梁敗走我兵追至杉樹  
凹沿途又殺賊二十餘名忽有伏賊三四百人  
由林內突出拚死撲壓官兵悉力抵禦適蒲尙

佐等帶兵從旁抄擊而來該逆竟敢分投抗拒  
兵勇亦卽竭力迎擊立斃賊四五十名生擒四  
十餘名匪衆卽潰敗遁入老林時鄭啓貴由銅  
錢垵進兵亦斃賊二十餘名生擒十餘名因山  
徑險窄密林叢雜復令步隊兵勇追至半山賊  
衆復恃險推擲木石如雨官兵冒險上攻鎗擊  
箭射斃賊五六十名賊勢始形慌亂我兵乘虛

搶上分投痛加剿殺又斃賊四五十名生擒三十餘名餘匪丟棄刀矛亂竄由右手遁逃搶獲賊旗刀矛甚多共擒賊匪一百十二名訊出藍號大旗首汪其義白號探馬頭舒國黃號探馬頭任廷爵田朋高藍號大頭領馮世哲五名並戰手王大有等七十九名當卽分別臠割正法難民照例省釋旋探黃號賊匪二百餘人分走

菌扒老林蒲逆股匪向散水河走瓦桑河北窺  
時德昌在葛藤口一帶臣卽飛飭令其星夜帶

兵探剿黃號餘匪大兵仍分路抄截蒲逆並白  
號零匪初三日德昌探得王家山左側菌扒一

帶老林內果有賊匪二百餘人屯聚當派遊擊  
馬濟盛等挑帶兵勇趕至該處剿殺十餘名活  
擒六名德昌仍帶兵探蹤由唐家坪追剿初五

日探得該逆由岱坡屯於蔣池溝有上金頂山  
西竄之勢德昌又令馬濟盛麻光裕周永泰鄒  
志賢等帶練勇由左山梁下壓令羅綸唐盛高  
曾連鳳等帶兵先伏林內德昌率同營總和隆  
武叅將承祿都司韓瑛馬天益守備胡光煥等  
帶兵勇順溝直進初六日卯刻周永泰等練勇  
直上立斃賊匪二十餘名逆衆慌亂奔向老林



竄逃被羅綸等官兵自老林內突出又斃賊二十餘人時有餘匪二十餘名順溝奔逃復被德昌和隆武等悉數殲除尙有零匪五六十名鑽入老林當令兵勇分投搜捕有受傷後自縊者十二名令前獲之黃海士逐一指認內有偽總兵李浩浩大旗首級大受二人共計殺賊九十餘名擒獲男婦賊匪六十八名口查訊獲犯內

有偽總兵田大秀偽千總唐宗裕逆妻唐蕭氏  
三名並李洪浩嚴大受首級解送來營其舒仲  
先等三十八名俱受重傷當卽正法難民二十  
八名口訊明省釋現仍探蹤追剿是日色爾滾  
達勒精阿武隆阿蒲尙佐帶兵趕抵蔡家壩連  
日沿途逃出難民多有來營請票及自行渙散  
者探得蒲逆由泉河東逃有北折泉溪之勢色

爾滾等分路抄截初七日午刻兵抵泉溪知賊  
已於清晨竄過螞蝗坡遂盡力窮追至陝楚交  
界之百人溝趕上賊尾該逆遂分出二百餘人  
竄走南江河一股三百餘人向右手逃上大山  
時已昏暮兵馬趕行不下二百里卽於該處露  
宿旋探過河之賊屯於玉皇廟並無蒲逆在內  
其右手上山之賊屯於老林內之瓦屋溝一面

飛行知會穆克登布喜明一面令副將鄭啓貴  
叅將沈洪遊擊曾壽虎正林等帶原兵渡河追  
剿又查得老山內瓦屋溝一帶馬力難施色爾  
滾達勒精阿武隆阿蒲尙佐等商酌於初八日  
四鼓督率兵勇均卽步行前進時大霧迷漫未  
至山頂賊衆業已迎頭而來猝遇之下竟敢捨  
死對敵我兵一擁競進刀砍矛戳立殺斃賊七

八十名生擒五十餘名餘匪奔上山梁紛紛散  
竄兵勇分投趕剿又斃賊三四十名獲犯三十  
餘名是日分兵四出搜捕至晚兵勇等又皆露

處

臣

查該處老山週圍不下二百里盡係密林

巖坎易於躲藏遂令多分兵勇於山中遍處細

加搜查其山外各處隘口

臣

同賽冲阿長齡温

春富僧德富翰都當阿馬瑜督率各員弁各帶

兵勇或數十名或百數十名不等星羅棋布直至十二日先後共搜獲賊匪一百五十二名訊據獲犯陳貴達等供稱蒲添竇一行五人由右手走了又有三十多個人由左手逃去副將馬元卽帶兵從右手搜尋殺斃賊匪一名生擒劉思義張明二名訊稱蒲添竇害怕得狠自己把辮子割了穿的綢子衣服帽子牙子也都丟了

他與一個姓楊的往前頭走了馬元旋於路上  
拾獲該逆辮子衣服矛子等件卽令該犯等認  
識均稱是實叅將馮元向左手追賊殲斃七名  
生擒何居禮等十六名竄逃十三四名訊無蒲  
逆在內臣復飭逐處詳搜至副將鄭啓貴叅將  
沈洪遊擊曾壽虎正林等帶兵追剿蒲逆分股  
之賊時賊匪過河北竄被喜明帶兵由牛頭店

兜剿而來該逆折回正在渡河鄭啓貴等帶兵  
追到前後夾擊殺死淹斃賊匪數十名賊遂折  
向黃龍溝大梁老山而遁兩軍分追均有擒斬  
查蒲逆並未過河又聞穆克登布帶兵前來喜  
明等遂商酌接辦令鄭啓貴等撤兵回營十一  
日又據穆克登布喜明先後稟報接辦後分派  
將弁兵勇在於老鴉絆茅坪撒子坪溜溪溝濫



河腦各處堵剿殺賊數十人共擒活賊二十七  
名內有大旗手李洪等訊據供稱只有冉總兵  
在內男婦共有二百餘人除殲擒並淹斃外只  
剩百餘人大半婦女幼孩多係空手該鎮等現  
與副將銜閻俊烈等分赴東西兩河搜捕十三  
日藍翎把總張應鼎帶兵丁袁祥瑞張倬林顧  
榮張朝應等四名在於瓦屋溝腦巖坎內搜獲

賊匪龍茂蘭一名詢以蒲添寶下落據該犯稱  
是日大家原趁著大霧下山跑到那溝腦上只  
見蒲元帥一個人慌慌忪忪躲到那崖坎下去  
這幾日也沒有出來我餓不過出來尋水喫等  
語當同該犯前往指視係高崖三層惟中層更  
爲壁立樹木叢雜卽聞腥臭之氣知下有屍軀  
張應鼎等攀附而下至二層崖上見二層崖半

腰樹上有倒懸一屍無援可下張應鼎等遂各解裹脚搭包爲繩將張朝應縋至山腰見屍身倒掛於樹埡之上髮辮割去疑是首逆蒲添寶遂將首級割下並獲犯龍茂蘭一併解送前來

臣查驗首級業已發變模糊難辨惟髮辮割去外尙有五六寸長令同夥管理功勞簿之何居禮識認堅供真確一面差弁赴馬元處查取抬

獲辮子仍令前後陸續各獲犯指認僉稱蒲添  
寶面貌圓臉無鬚年約三十歲額角兩邊無髮

衆口如一驗俱相符旋將馬元所獲辮子驗明

刀痕斜右係自割斷與首級短辮相對色同而

割痕亦合臣復恐不實遍加詢查適有竹谿縣

徐如灝押運糧餉到營稟稱途次盤獲藍號賊

匪鄧孟朝一名當詢蒲逆面貌形狀據稱習見

該逆有左耳短小右耳長大之異

臣

復傳鄧孟

朝令隨營文武各員查驗首級左耳短小右耳長大實係迥別是此反覆辨認均稱的係正身

無疑所有藍翎把總張應鼎請卽以千總陞補其兵丁袁祥瑞張倖林顧榮張朝應四名共賞銀一百兩以示鼓勵查首逆蒲添寶與冉文儔

同時起事連年稽誅餘燼復熾茲因被剿情急

先自割去髮辮丟棄衣帽器械意圖免脫值兵  
勇四出分投趕剿該首逆迫不及脫遂藏匿下  
巖冀延殘喘不料山巖高陡猝致跌斃倒懸掛  
樹可見該逆罪惡貫盈無從倖免全股根株掃  
淨洵足以彰

國典而快人心查色爾滾蒲尙佐等自趕辦蒲逆  
以來不分風雨晝夜督兵跟追總未予以稍暇

迨同達勒精阿武隆阿等協力追剿該逆輾轉  
於老山之中狂奔愈速色爾滾蒲尙佐達勒精  
阿武隆阿等常川步行露宿此次兩日夜趕剿  
三百餘里未令竄陝得以集事臣擬于經畧額  
勒登保送來

欽頒賞項內酌撥銀二千兩分賞達勒精阿色爾滾  
兩路滿漢兵勇以示獎勵其餘出力員弁兵勇

容俟查明另奏至於全楚現在大局二竹一帶  
尚有零匪一二百人及數十人者數起興巴歸  
東一帶有青黃兩號熊方青熊翠賊股六七百  
名鐵姓一股五六百名王國賢餘匪並崔胡戴  
四一股各有二三百名臣前奏商令長齡在於  
二竹督同孫清元德昌趕辦零匪今臣親歷二  
竹采入其境自應隨時通盤籌計是以商酌令



長齡帶同孫清元一路兵勇由房縣先赴東歸  
一帶督同吉林泰李天林等分投趕辦就近卽  
於房縣將陝省撤回兩湖官兵各百餘名歸併  
管領前進自東而西相機兜剿

臣

督同德昌現

將二竹各零匪分投趕辦完竣仍令德昌帶兵  
在於二竹往來遊奕搜捕

臣

卽移師取道房縣  
之彎腰樹前赴興巴一帶自西而東隨時搜剿

至於達勒精阿武隆阿等前經

奏明令其回守大寧邊界嗣<sub>臣</sub>以蒲逆被追窮蹙

逼近陝界正在喫緊之際未便拘泥遽爾撤回

是以仍令併力掃除茲蒲逆大股及黃白號零

匪均已剿殺殆盡此處相距雞心嶺不過二百

餘里<sub>臣</sub>卽令其帶領原兵就近仍回徐家壩防

堵再查陝省苟逆已除只有餘匪三四百人竊

計不日即可廓清卽川省各零匪計亦不上千  
名自亦易于集事至於楚省各股零匪較多約  
計不過二千餘人或山中尚有藏匿零匪諒亦  
不過數起此際功虧一簣臣惟有鼓勵兵勇趕  
緊搜剿以冀迅速與川省一律蔽功斷不敢稍  
事稽延再此次打仗陣亡四川藍翎戰兵王世  
德一名兵勇內受傷及陣亡者容俟另行咨部

辦理再接據總兵吉林泰稟報七月二十九日  
探有一股賊匪屯於歸州之水田壩派都司張  
大勳帶兵勇由鹽水河前進吉林泰帶馬隊官  
兵由螞蝗觀大路馳擊是日黎明微雨張大勳  
等行抵水田壩見賊散屯民房卽率兵勇攻撲  
斃賊十餘名賊衆慌亂四散奔逃追至大山大  
雨如注鳥鎗不能施放詎賊呼哨蜂聚乘勢下

歷值吉林泰等督兵趕到奮力抵禦向董家坪  
翻山而去因雨大泥滑未便窮追卽在該處紮  
營詎該逆於三更時率衆偷撲叅將楊安都司  
陳安信等營盤官兵正在前營抵禦斃賊四十  
餘名不料賊匪詭譎忽從後營衝撲叅將楊安  
都司陳安信分帶官兵出營力敵均各受傷幸  
各營分兵策應賊卽逃去陣亡並受傷弁兵俟

查明另報臣查該鎮所剿之賊卽係熊方青熊

翠股匪不過六七百人乃於黑夜偷撲營盤幸

官兵力敵擊退現已飭令隨時慎密並趕緊剿

辦矣奏入

上命軍機大臣傳諭額勒登保德楞泰曰德楞泰奏  
剿除蒲添寶大股並擒斬監黃白三號大小頭目  
多名覽奏欣慰已明降諭旨將德楞泰及色爾滾

等分別加恩矣楚省零匪惟蒲添寶一股爲數較  
多今既擒斬無餘此外零星散竄之賊統計不過  
二千餘名德楞泰乘此軍威勝勢率同長齡等分  
投搜剿諒無難一律廓清務於秋令成功受國渥  
恩勉之望之其奏稱總兵吉林泰一路在歸州水  
田壩一帶有賊衆偷撲營盤力擊始退查係熊方  
青熊翠股匪六七百人等語是此一股零匪較爲

緊要德楞泰當酌量情形或卽親移大兵前往剿辦或揀派得力鎮將分帶勁兵幫同吉林泰追剿以期迅速辦淨至額勒登保前此辦竣苟逆後彼時陝省零匪無多而楚省賊股較衆恐德楞泰一旅之師祇能專辦蒲添寶股匪其餘歸巴等處崔胡戴四等匪不能兼顧是以節次降旨令額勒登保帶兵前往協剿今德楞泰旣將蒲逆股匪殲辦



淨盡已可騰出兵力次第掃除揆之現在情形如  
額勒登保尙在陝境又可不必急於赴楚惟應將  
陝省剿斬張各股零匪三四百人一律辦淨肅  
清全境再赴楚省若此旨到時額勒登保業已移  
師楚境亦可不必回陝卽應與德楞泰一心辦理  
將楚省未淨餘匪分投剿捕迅就肅清彼時如陝  
境零匪業經楊遇春等辦淨而川省零匪又已搜

捕無遺額勒登保卽可就近與德楞泰及勒保吳  
熊光等會商彼此聯銜用紅裏黃面之摺奏報三  
省大功全竣由六百里加緊馳遞捷音一到卽可  
宣示中外渥沛恩施額勒登保德楞泰惟當勉之  
又勉迅速戡功同膺懋賞所有此次陣亡藍翎戰  
兵王世德著咨部賜卹叅將楊安都司陳安信受  
傷之處曾否痊愈並著遇便覆奏

同日

上諭內閣曰蒲添寶一犯與冉文儔同時起事爲積年逋誅巨惡前經德楞泰督兵追剿該逆復向老林四散奔逃異常狡猾並沿途裹聚藍黃白等號零匪賊數增多經德楞泰分飭色爾滾浦尙佐達勒精阿武隆阿等緊躡賊蹤分路逼剿連日擒斬一千數百餘人該逆隻身逃向崖坎藏匿復經官

兵追逼該逆情急墮崖倒懸崖樹身死實足大快  
人心皆由德楞泰調度得宜所致著先交部從優  
議敘並賞給鑲玉帶頭一個玉四喜搬指一個玉  
翎管一個黃辮珊瑚豆大荷包一對小荷包四個  
德楞泰現係三等侯卽日大功告成俟捷音奏到  
再當渥沛殊恩酬庸懋賞色爾滾達勒精阿武隆  
阿蒲尙佐等督率兵勇步行前進盡力窮追俱屬

奮勇可嘉均著挑在乾清門行走仍交部議敘並  
各賞給玉搬指一個大荷包一對小荷包四個其  
餘在事出力人員著德楞泰詳晰查明應如何分  
別陞賞之處開單保奏候朕加恩茲發去小刀五  
把堪達罕搬指五個磁搬指五個著先行賞給出  
力員弁又一兩重銀牌二百面五錢重銀牌二百  
面著賞給此次出力兵丁以示獎勵其所請將藍

翎把總張應鼎以千總卽陞及兵丁袁祥瑞等四名賞銀之處均照所請分別陞賞

同日陸有仁奏言連日據探報經畧額勒登保移師寧陝屬之洵陽壩督飭楊遇春等搜剿苟逆餘匪登有斬獲並將苟逆之弟苟文舉生擒餘匪已將次淨盡其斬逆賊匪分股奔竄經總兵楊芳擒殲十餘名內有旗手郭士善一名

又副將應元寬剿辦之賊竄至盤屋安溝一帶  
與扎克塔爾所追賊匪合夥應元寬等現在挑  
帶兵勇星馳截剿又張逆零匪一股經通判維  
昂督率寨勇殲斃十三名生擒十名經畧額勒  
登保因靳張等尙在稽誅復添派總兵李應貴  
副將吳廷剛等由江口等處分道自東而西探  
蹤會剿大營卽擬移至兩河柴家關一帶居中

督飭近來疊據山內督辦司道並地方官稟報  
寨勇搜獲餘匪或數名或數十名不等並有自  
赴寨員處投首者俱經就近報明經畧分別辦  
理至裁撤鄉勇一事現在專委總辦之道員朱  
勳副將王兆夢已將大營發回之鄉勇一起先  
爲分別遣散此內有情願入伍者卽交營入冊  
其願回原籍之人籍隸陝省者卽分交各地方



官妥爲安頓應回川省者由沔縣寧羌一帶送  
至廣元縣屬川陝交界接替應回楚省者由石  
泉水路直送鄖陽府屬陝楚交界接替逐起遣  
送分道行走庶途間不致擁擠已先期飛咨川  
楚二省督撫專派大員在於交界地方逐起點  
收分別妥辦該鄉勇等所持器械官發者卽行  
收繳自置者酌給價銀收買據朱勳等稟報此

次遣散共計一百五十餘人分起行走尙爲安  
靜因川省人數稍多該道卽親自送至寧羌沿  
途照料仍會同副將王兆夢馳赴沿邊一帶就  
有營盤之處逐卡遣散臣諄飭該道等必須持  
以鎮靜妥爲經理斷不可稍有張皇草率總之  
此等鄉勇從軍業已七年平日著有微勞此時  
自應加之體恤而逐程遣發旣不可明示防範

以啓其疑設有滋事之徒亦必須酌量示懲以  
儆其衆容俟該道等逐卡辦理完竣另行專摺  
奏

聞前奉

諭旨賞撥豫省銀三十萬兩臣已飛咨催解惟是歸

還甘餉十七萬二千餘兩僅餘銀十二萬七千

餘兩尙不能濟目前之急緣兵勇以次裁撤經

費原大可節省而現需清還前欠及酌商遣回鄉勇等項其費實屬不貲種種情形自邀

聖明睿鑒再自軍興以來各鄉勇前赴營卡及地方官處投充往往自帶刀矛等項器械皆由各處鐵舖打造彼時因待用孔亟且處處皆然勢不能禁其置造現在大功卽日告竣正當賣刀買犢之時豈可再任私造利器臣已嚴飭地方官

實力查禁除民間動用農器及菜刀鎌鋏之外  
概不許私造刀矛等件有犯必懲其各寨所存  
銃礮器械亦經札飭寨員預爲查明註冊俟餘  
匪淨盡卽一律收交

同日吳熊光奏言前准德楞泰來信內稱蒲  
添寶復與別股零匪會合共有一千四五百名  
臣以該逆人數較前轉增恐難剿辦茲探報該

逆自川竄回楚境德楞額派兵抄迎追擊沿途  
時有斬獲該逆由竹山屬之馬塘西竄竹谿大  
禾田雲霧溪等處總兵蒲尙佐副都統武隆阿  
等抄至雲霧溪截擊殺賊六十餘名生擒三十  
餘名繼又乘勝緊追至百仞溝地方痛加殲戮  
斃賊四五十名生擒一百數十名該匪渡河奔  
竄淹斃四五十名餘匪四下散竄等語又據報

總兵德昌在竹谿境內搜剿探有零匪一股竄  
匿菌扒老林該鎮率同遊擊馬濟盛都司麻光  
裕等帶領兵勇趕入老林搜捕殺賊十餘名生  
擒六名訊據獲賊供係黃號餘匪復追至唐家  
營地方殲斃擒獲共數十名該鎮復聞蒲添寶  
一股竄近抄出石板河攔截適遇蒲逆股匪被  
德楞泰剿散由豐溪金溪一路竄至該鎮迎頭

截殺多名生擒四十餘名臣伏查楚境賊匪蒲

添寶一股人數稍多今疊加擊剿仍行渙散該

逆現竄處所係楚陝交界官兵追躡賊蹤總兵

蒲尚佐尤爲不辭勞瘁不肯予賊以暇而陝省

邊界又有總兵穆克登布等官兵扼要截擊定

易得手但此股賊匪臣留心訪詢本係川省各

股零匪攢集而成是以矛手較多爲首者實亦



不止蒲逆一名既經官兵擊散必須乘勝搜剿

方免復行糾擾臣接准德楞泰來信稱二竹山

內賊匪除蒲添寶外其餘零星無多有總兵德

昌一路官兵足敷剿辦歸巴一帶零股賊匪無

多商令提臣長齡率同總兵孫清元前赴歸巴

與總兵吉林泰李天林分投搜剿德楞泰伊將

蒲逆剿淨亦卽移師歸巴等處督剿長齡現從

竹谿一帶前赴東南

臣

俟長齡行近卽行馳往

軍營將應如何剿辦情形與之面籌惟冀迅速  
廓清斷不敢稍任遲緩均奏入

上命軍機大臣傳諭陸有仁曰陸有仁所奏各路搜  
剿情節大畧均與額勒登保惠齡等所奏相仿惟  
應元寬一路前據惠齡奏到該副將因追剿苟七  
麻子股匪遇伏陣亡陸有仁想尙未得信再前因

湖北賊數較多命額勒登保前往楚省會剿其陝  
省搜捕事宜責成楊遇春楊芳專辦本日德楞泰  
奏到業將蒲添寶一股首夥殄除淨盡現降旨令  
額勒登保速將陝省零匪督率搜捕無餘再移師  
赴楚如此時業已起身陸有仁係該省巡撫當會  
同將軍總督將搜捕及善後事宜妥協經理其裁  
撤鄉勇一節陸有仁派委道將等將川楚各鄉勇

分起送歸所辦尙云惟送至交界後如何接收之處尙未據勒保吳熊光奏到現已降旨詢問至收繳軍器一事陸有仁札飭寨員預行查明辦理並飭令地方官嚴禁私造固應如此辦理但此事全在派委得人若地方文武奉行不善甚至胥吏等橫行訛詐將應繳軍器私行賣放而於民間尋常應用之件轉行厲禁豈不大爲擾累陸有仁當時

刻留心經理務臻妥協又據奏餉銀一項豫餉到後不敷撥還甘省等語前因陝省軍需項下有應支應找各款目下歲功在卽自需逐項清理已於本月十一日降旨將河南存貯及兩浙廣東等省奏銀一百萬兩賞撥陝省交陸有仁備用陸有仁發摺時尚未接奉前旨此項賞銀到陝省後極爲寬裕所有應歸甘省十七萬餘兩務須照數撥還

不可再有稽緩並著於一切支用之處留心撙節  
勿涉浮濫

上命軍機大臣傳諭吳熊光曰本日德楞泰由六百  
里加緊遞到奏報蒲添寶一股業經德楞泰痛加  
剿擊蒲逆墜崖懸樹身死全股首夥殄除淨盡想  
吳熊光發摺時尚未得有此信現在楚省賊匪蒲  
逆大股已除其餘零匪不過二千餘人德楞泰騰

三十三

出得勝兵力自不難迅速掃除額勒登保將陝省零星竄匿之賊督率搜捕無餘再移師赴楚其時德楞泰自己將楚匪辦竣如尙有一二小股未淨額勒登保大兵一到更可尅期掃蕩彼時即可會商大功全局告成惟計日以待捷音之至此事原自楚始必在楚成目下楚省正當搜剿喫緊功屆垂成之際各路糧運尤須源源接濟此係該督等

專責前據吳熊光全保請撥軍需銀兩業令馬慧  
裕佶山分撥銀五十萬兩解往該省又截留湖南  
省捐監銀十萬兩餉項極爲寬裕吳熊光務當督  
飭局員妥速供運勿稍缺乏爲要同日又據陸有  
仁奏陝省撤回川楚鄉勇派員送至交界地方已  
先期飛咨川楚督撫專派大員在交界地方逐起  
點收接替護送等語川楚二省係派何員在交界



接收並未據勒保吳熊光等奏到安插鄉勇爲善  
後第一要事屢經諭令該督撫等認真辦理今陝  
省送歸楚省原籍鄉勇該督於接到陝省知會後  
自應先派妥員在境等候接收護送勢不能令陝  
省委員直送至原籍處所若楚省無護送之員該  
鄉勇等一入楚境乏人照料任其中途四散未必  
俱能安靜歸里此事殊有關係著傳諭吳熊光遵

照奏定章程速派大員妥爲經理並將派委何員  
及鄉勇等沿途行走情形附報覆奏

吳熊光又奏言據都司麻光裕稟報前在巴東  
柳樹灣乘夜將佔住民房之黃號股匪剿殺逃  
竄天明後向山搜捕見老林崖下有跌死賊屍  
一軀帶有矛傷三處所穿俱係綢衣與衆賊不  
同疑係賊營頭目當時因剿賊無暇未及細訊

今訊據獲賊張官保供稱是夜賊首唐大信從  
屋內衝出被官兵戳了幾矛帶傷逃走旋即滾  
崖身死所供面貌衣色與前在崖下所見跌斃  
賊屍一一符合賊首唐大信業已戳傷跌斃無  
疑等語除再行提犯查訊外理合先行附奏奏

入報

聞

欽定剿平三省邪匪方略正編卷三百三十五

壬戌年

八月二十四日

壬戌

額勒登保奏言據扎克塔爾

格布舍等報稱斬士黃股匪被剿狂奔分竄秦

嶺副將張瑗等於初四日傍晚趕抵諸寧寨探

知賊匪在對面山林藏匿相距數十里張瑗當

卽率同都司張起鰲等乘夜進剿初五日天甫

黎明行抵該處奮力掩擊殺斃賊匪十名內有

偽總兵胡登朝一名賊匪驚慌四散匿入林箐  
張瑗張起鰲等各帶兵勇分路搜捕共生擒賊  
匪十九名扎克塔爾等帶領馬兵亦順溝抄截  
前來訊據獲犯郭大用韋超凡供稱我們本隨  
元帥靳士黃一路因官兵追殺緊急靳士黃領  
幾千人分路走了我們同總兵胡登朝們帶領  
五六十人在這老林藏躲不料官兵到來胡登

朝已被殺死我們被獲等供當將該犯及從逆  
日久之李地長等十三名均卽正法其餘葉之  
魁等六名被脅未久當卽釋放又據探報張芳  
苟朝九賊匪由黑肱厝杜家墳向猪槽溝一帶  
東竄應元寬朱槐等連日徒步跟追由就峪田  
峪至鐵爐岔探得該匪由小白岩逃遁相距不  
遠該處峭壁深林官兵等覓路攀援而上副將

應元寬首先帶領兵勇旋探旋進行至半山忽  
遇賊匪數十人在竹林叢雜處藏躲維時我軍  
全隊尙在後面擁擠未到應元寬督率隨從弁  
兵鄉勇十數人奮力衝殺立將賊匪殲斃二名  
餘賊敗潰應元寬等奮力追趕不料樹林內又  
有伏賊十數名突出應元寬猝不及防身受矛  
傷殞命于總劉朝高把總邱福貴各帶矛傷均

不甚重叅將朱槐等帶兵繼至兵勇等人人切齒併力向前鎗箭並發連斃兇悍賊匪六人餘匪向山巔林內遁去現在緊躡追捕等情

臣查

應元寬隨同臣剿賊有年素稱得力由未弁游

陞副將蒙

賞勇號並恩騎尉世職該員報効情殷焦憤倍切此次在山內剿捕賊匪與士卒等徒步奔馳艱險



備嘗數旬不懈尤爲奮勉出力茲因急於追剿  
倉猝陣亡衆官兵莫不憤恨倍常旋探得該匪  
由黑洞溝磨子坪竄向地牢一帶總在秦嶺迤  
北大山躲藏遊擊劉元明鍾慶宦等帶兵由東  
嶽廟秋水庵截剿叅將朱槐遊擊劉琥等帶兵  
由磨子坪一帶進剿總兵李應貴帶兵由金牛  
坪碾道木子河趕往分頭兜剿楊遇春又復由

莖萊坪光頭山一帶設伏迎擊以期將此股餘  
匪迅速殲除又據楊芳報稱派出分路剿賊之  
守備李官富等於初八日追賊至白羊坪賊匪  
約有三四十人遁入箐林當卽分路搜殺斃賊  
五名初九日追至松埡子老林又殺斃八名生  
擒賊匪鍾元一名十一日追至北河時值大雨  
賊在空房屯劄軍功高明率領兵勇殺賊十一

名餘賊十七名向房後老林逃匿兵勇上前跟蹤搜捕又殺四名生擒季麻子等五名又千總吳順於初五日追賊至滴水巖殲斃十四名生擒唐萬林江仕文二名該千總沿河追剿之時被賊持矛回戳左腿受傷落水飄流數丈經隨行兵勇撈救幸未殞命楊芳現亦將該傷弁等歸集一路探聽張芳苟朝九竄蹤併力協剿至

張士雲張士熊率領殘匪數十名據探報已歸  
入張芳夥內並據通判維昂稟報亦屬相符

臣

已飭令各鎮將等趕緊剿捕務期弋獲至慶成  
現已奉

命回京該一路馬步兵勇三千餘名

臣

已飭交格布

舍帶領於華陽一帶協剿斬士黃分股賊匪毋  
再稽遲又據穆克登布報稱近日楚境賊匪被

剿竄川均距陝境不遠該提督率同總兵喜明  
守備柯藩分路查探防剿據柯藩派往川境探  
信之軍功王盛周等十四名稟稱行至太平屬  
之二台坪地方探有零匪三十餘名在彼藏匿  
將民人王大有有一家數口擄去該軍功等聞信  
幫同該處寨民前往剿捕殲斃賊匪四人殺傷  
十餘人餘匪潰散將民人王大有等男婦數人

救出取具該處寨民領狀呈驗又據遊擊楊雲  
霄稟報探得楚境有賊一股竄至川境之雞心  
嶺恐竄入陝境卽馳往茅壩迎剿賊匪遙從山  
林竄出當卽奮力迎擊賊匪不敢抵敵仍向川  
境之一碗泉遁去該遊擊跟蹤追捕擊獲賊匪

徐朝亮趙登先等七名餘賊已連夜翻山遠遁

川境臣現仍札知穆克登布並飭令喜明柯藩

等不分疆界有賊卽剿並將所獲賊犯正法所  
有殺賊弁兵酌量發給銀牌銀錠前往獎賞再  
副將應元寬陣亡時兵勇等只傷亡數人容另  
查明咨部辦理奏入

上命軍機大臣傳諭額勒登保曰此次扎克塔爾格  
布舍楊芳等分投搜剿餘匪均有斬獲此等零星  
竄匪無難以次殲淨至副將應元寬因追剿張芳

苟朝九賊匪突遇伏賊身受矛傷殞命一節前已  
據惠齡奏到業將應元寬加恩照總兵陣亡例賜  
卹張苟等逆膽敢設伏戕害大員其勢未免稍張  
現在額勒登保分飭鎮將等分路兜擊楊遇春復  
由韭菜坪一帶設伏迎剿以期將此股餘匪迅速  
殲除所辦甚是額勒登保務飭楊遇春等將該逆  
殲擒遵照前旨割取首級致祭應元寬以慰忠魂



昨據德楞泰奏到已將蒲逆首夥殲戮淨盡當卽降旨傳諭額勒登保如尙在陝境不必急於赴楚惟應將陝境剿剩各股零匪加緊迅速一律辦竣再赴楚省若額勒登保業已移師楚境亦可不必回陝卽應與德楞泰同心協力將楚省未淨餘匪分投剿捕迅就肅清彼時如陝境尙有一二零匪額勒登保係屬經畧陝省領兵各員皆其所轄亦

可在楚轉飭陝省鎮將上緊辦竣毋任稍有稽延  
至千總吳順跟剿零匪殲斃十餘名因沿河追捕  
之時被賊矛戳傷左腿落水經兵勇撈救殊爲奮  
勉吳順著加恩遇有守備缺出卽行陞用

額勒登保又奏言竊查

乾清門侍衛副都統桑吉斯塔爾並三等侍衛碩  
敦保富挺藍翎侍衛富昌護軍叅領雅林保副

叅領色布新額五員出師數年屢著勞績現均  
無專帶官兵可以卽令回京並分帶凱旋官兵  
前進臣昨已飭令均赴西安歸集令祥保温承  
惠照料起程其某員帶領某隊仍臨時酌定由  
祥保等恭摺具

奏奏入報

聞

同日勒保奏言查總兵張績一路官兵在巫山所屬龍泉寺地方扼要駐劄以防巴東竄匪茲據報稱初七日探有賊匪屯聚巴東羅溪壩分賊二三百人由陳家坡竄向三溪河有入川之勢張績探蹤迎擊行抵三合舖該匪正由三溪河竄來官兵卽就近在鐵廠灣樹林內埋伏賊匪不知有兵紛紛蜂擁而來叅將桂涵遊擊晉

之連帶領兵勇從林內突出將賊匪衝作兩段  
張績督率遊擊門繼春馬明德都司傅廷標等  
帶領官兵迎頭截住鎗箭齊發立斃賊匪三四  
十人生擒十七名後起賊匪見有官兵截擊卽  
亡命折回桂涵晉之連帶領兵勇緊躡追殺復  
斃賊十餘名生擒九名餘匪四散奔回楚境我  
兵追至巴東所屬火峯乾溝其羅溪壩所屯賊

匪聞川省有兵探剽卽向東奔竄距川界已遠  
張績等撤回川境當將活賊王連城等查訊據  
供我等係青號熊總兵夥內的人熊總兵因湖  
北兵多要過四川逃竄屢次走過界嶺皆被川  
省官兵截回近日聞得大兵都向大寧一路追  
去想巫山沒有官兵防守所以叫探馬頭周四  
桂帶了我們二百多人前來探路不想一過界

嶺卽遇官兵截殺那周四桂被官兵在林內衝  
出時已經中矛身死等語張續當將活犯解送

前來

臣

親提訊明均係戰手概行正法又據達

斯呼爾岱等稟報初十日探得張長青股匪在  
張家灣竄走約剩二百餘人是夜適大雨如注  
料賊匪不防官兵前往達斯呼爾岱羅聲舉等  
遂夜發兵次日黎明官兵由金竹園斧頭崖

路抄出分水嶺探報賊匪在大水田山梁暫息  
達斯呼爾岱卽帶副總管格亨德爾等帶領馬  
步官兵抄出賊後羅聲舉率同叅將蕭鳳來等  
策勵兵勇仰攻賊匪佔踞山梁憑高擲石抗拒  
蕭鳳來帶兵首先衝上鎗箭齊發斃賊一二十  
名賊始翻山竄走迨遇達斯呼爾岱一路官兵  
攔截賊匪無路可竄捨命衝突格亨德爾等帶



兵衝擊箭斃執旗賊一名殺斃賊二三十名蕭  
鳳來等亦督兵翻山下壓賊匪分作三四股四  
路亂竄官兵將賊匪七八十人壓至山溝殲斃  
四五十名生擒二十七名餘匪鑽越林箐逃散  
當將活賊羅元等解送前來臣親加提訊據供  
此起賊匪係張長青爲首又有兩個先鋒一個  
姓林一個姓沈此次遇見官兵張長青帶了三

十多入先走了其餘被官兵殺了好些擊了我  
們二十多人現在所剩不過六七十人等語

臣

當將羅元等戰手十六名訊明正法訖其被擒  
難民分別遞籍釋放又據遊擊羅思舉稟稱在  
忠州汝溪灘地方探有零匪數十人羅思舉卽  
探蹤前往殺斃賊匪十餘名生擒賊十二名訊  
係白號剿散零匪內有王日俸一名係王三槐

之姪廣秀一名係廣向瑤之姪均係前被官兵  
剿散藏匿各處林箐此次被兵殲斃羅思舉當  
將活賊潘建等七名解交梁山縣審辦難民釋  
放又據叅將傅廷佐稟稱在大竹七方塩梅家  
槽等處先後搜獲零星匪殲斃二十三名生擒叅  
應貴等八名解交大竹縣審辦又據田朝貴稟  
報該鎮在川北防剿探得陝省有零星匪百餘人

在太平河後山松坪一帶老林竄走田朝貴卽  
派遊擊薛陞分帶兵勇向獅子口抄截田朝貴  
親率官兵在大梁迎截該匪在老林輾轉奔逃  
官兵緊躡追剿連日在齊家溝五台子焦家溪  
等處先後殺賊三十餘名生擒三十五名餘匪  
一二十人逃散無蹤查訊活賊內有蔡明亮楊  
貴二名據供係張添倫股內偽總兵其餘周現

章二十五名俱係各股逃散老賊田朝貴因距  
臣路遠訊明卽分別正法難民釋回又探得有  
苟逆分股賊匪二三百人由陝省竄至南江縣  
所屬鐵船山老林田朝貴聞信卽帶兵勇探蹤  
剿辦賊匪竄至鐵冠寺與官兵迎頭相值官兵  
扼住埡口鎗箭齊發殺斃賊匪三四十名生擒  
八名查訊活賊李仁芳等據供係苟文明股內

分出共二百餘人賊首胡姓帶領要想由四川  
邊子老林竄往湖北等語田朝貴訊明李仁芳  
等六名均係老賊卽行正法其索問學趙守明  
二名係畧陽新擄難民釋回安業臣又接陝省  
來信西鄉地方有賊一股竄走九滾坪經官兵  
追剿殲獲多名該匪已向太平所屬皮窩舖一  
帶奔竄等語現據探報此起賊匪已竄至八台

山一帶臣已飭田朝貴就近分兵剿辦又據太

平團練委員周一鳴稟稱該員所管段內線期  
坪地方有零賊一二十人竄近該員卽帶領寨  
勇截擊斃賊數名生擒賊首張廷裕一名訊據  
供稱係首逆張添倫之子賊中稱爲少掌櫃上  
年六月間在西鄉被兵剿散與僞總兵王興一  
路逃去後來王興被兵擒斬張廷裕卽帶二十

多人在老林藏躲經該委員率領寨勇擒獲錄

供稟報前來

臣

查前此殲斃張添倫時其姪張

廷舉所供本有張添倫之子張廷裕被兵剿散

不知下落之語今查張廷裕供詞一一吻合實

係首惡遺孽

臣

現已提解來營俟訊明再行正

法查川境舊有零匪日剿日少惟近日川北一

路連有陝省賊匪竄入想係苟逆剿散之賊現



聞苟逆已有殲斃之信則餘匪分股四竄勢所  
必然此時川北有田朝貴所帶兵勇二千餘人  
許文謨一路官兵及劉清所帶鄉勇亦共有一

千六七百人

臣

現飭分投探剿似已足敷辦理

至大寧邊界前有達勒精阿武隆阿一路官兵  
防守是以楚匪不能竄入昨達勒精阿武隆阿  
等因追剿蒲逆隨同叅黃德楞泰一路過楚水

寧邊界空虛現有賊匪三四股乘隙竄入每股  
一二百人三四百人不等約計共有千餘人此  
項賊匪無論在楚在川均屬應辦之賊但現在  
達勒精阿武隆阿一路官兵追賊過楚川東兵  
力不敷分撥臣是以一面寄信德楞泰囑其將  
此路官兵仍遣回川以保大寧門戶一面於張  
績一路撥出叅將桂涵於羅聲臯一路撥出叅

將蕭鳳來令其酌帶兵勇將現由楚省竄入之  
賊分投剿辦再豐紳一路官兵辦理雷波夷務  
業經完結現聞於七月底已經撤出此路官兵

向來本在川北防剿但此時賊勢川東北川北

較重臣現已寄信豐紳調令帶兵來夔將此項

官兵添設巫山大寧之間一俟達勒精阿武隆  
阿回川豐紳之兵與之彼此聲勢聯絡既可將

現有竄來之賊迅速分剿又可嚴防邊界不令楚省賊匪再有竄入奏入

上命軍機大臣傳諭勒保曰川省本境餘匪現剩無幾指日可就廓清卽陝省竄來零匪亦不過一二百人現有田朝貴等在彼搜剿無難刻期辦淨惟據稱大寧邊界現有楚匪三四股乘隙竄入每股一二百人三四百人不等約計共有千餘人等語

楚省蒲逆股匪經德楞泰一路大兵緊躡追剿其餘各股零匪亦經德楞泰分飭鎮將帶兵截擊該匪等被剿情急自必紛紛向川東邊界奔竄此亦勢所必然且不必治川省地方官防堵不嚴之咎惟應不分畛域實力剿辦不但無過而且有功若互相推諉獲咎愈重矣昨德楞泰奏到摺內亦稱川省餘匪不下千名自卽係出楚竄川之賊達勒

精阿武隆阿前因追剿蒲逆自應隨同德楞泰過  
楚今蒲逆一股業經殲除淨盡德楞泰已令伊二  
人帶兵回川又有張積羅聲臯本在川東而豐紳  
亦將帶兵來夔是巫山大寧一帶將廣兵多聲威  
壯盛勒保務須飭令豐紳等上緊堵剿其已竄入  
川者既可就地剿淨卽楚境邊界零匪亦不令續  
有竄入總當無分畛域迅速殄除毋任稍有稽延

以期於九月內肅清全境用戴大功同膺懋績勉  
之望之再昨據陸有仁奏陝省撤回川楚鄉勇派  
員送至交界地方已先期飛咨川楚督撫專派大  
員在交界地方逐起點收接替發送等語此項回  
籍鄉勇該督接到陝省知會後自應先派委員在  
境等候接收護送節次勒保摺內並未奏及安插  
鄉勇一事屢經降旨令該督撫等認真辦理今陝

省送歸川省原籍鄉勇勢不能令陝省委員直送鄉勇等至原籍處所若川省無護送之員該鄉勇一入川境乏人照料任其中途四散未必俱能安靜歸里此事殊有關係著傳諭勒保遵照奏定章程速派大員妥爲經理並將派委何員及鄉勇等沿途行走情形遇便覆奏

勒保又奏言竊臣昨奏迎剿楚省竄匪全股撲



滅殲斃首逆賴先鋒查此路滿漢官兵係達斯  
呼爾岱羅聲臯帶領在前中後三河一帶搜捕  
餘匪近因該境漸次肅清調令移赴川東適有  
楚省賊股竄入該將士等卽晝夜探蹤前來將  
賊匪全夥剿淨臣謹就各員中擇其平日勞績  
素著此次打仗奮勉出力者分別等第繕具清

單恭呈

御覽奏入

上諭內閣曰勒保奏遵旨查明殲滅首逆賴先鋒全  
股賊匪奮勉出力之滿漢員弁兵勇開單分別保  
奏一摺均照所請叅將蕭鳳來著加恩賞給副將  
銜遇缺卽補領催委叅領葉楚著加恩賞給哈濤  
巴圖魯勇號佐領委叅領潘太叅將胡定邦遊擊  
王泰守備王學閻俱著加恩賞換花翎額外驍騎

校噶爾岱著加恩賞戴花翎都司石成玉守備周  
吉圖張應祿千總馬成甲兵委官西楞額甲兵巴  
當阿額外外委楊文貴目兵熊萬陞黃應宗湯奇  
志羅守倫孫思成李彪鄉勇馬貴鐵貴楊應廷俱  
著加恩賞戴藍翎該部知道

勒保又奏言查前此

臣

因陸有仁信稱陝省軍

糧短缺咨商川省協濟

臣

當卽飭司籌撥大米

一萬石解陝協濟旋經藩司楊揆由川西各州  
縣撥米一萬石水運至川陝交界之朝天關經  
陸有仁派委候補知府李逢春前來接收

專

派川北道李鈺理事同知那山前往兌交茲據  
稟稱此項協濟軍米一萬石於六七兩月先後  
由水路分起陸續運抵朝天關由陝省委員次  
第兌收於七月三十日全數交清運陝訖理合

附片具奏奏入報

聞

同日吳熊光奏言據探報蒲逆在百仞溝被剿  
逃遁叅贊德楞泰督飭鎮將四路抄擊復於瓦  
屋溝追及賊隊擒斬百餘名該匪勢益窘蹙各  
路兵勇層層搜逼前進先後擒捕多名訊據獲  
賊僉稱蒲添竇被剿情急逃入老林旋於瓦屋

溝山崖下搜獲該首逆蒲添寶屍軀查係由懸崖滾跌而下爲崖樹枝格住倒掛身死割取首級送德楞泰營中驗訊屬實等語

臣

查蒲添寶

賊股前敗竄後復糾集零匪結隊狂奔實爲可

惡今幸仰仗

天威添加截擊該逆投崖身死實屬大快人心現在零星逃散之匪德楞泰督率鎮將搜剿自必不

遺餘孽二竹境內漸可廓清其有逸入陝界殘  
匪又有穆克登布喜明等帶兵截捕亦可無虞  
漏網至宜昌一路據總兵吉林泰李天林等稟  
報現在東湖興山境內已無零匪前此分竄賊  
股俱竄至巴東屬羅溪壩一帶該鎮等已率兵  
進剿房縣東面山內現有零匪一股竄出遊擊  
李貴等帶兵截剿該匪仍折回南竄亦有奔向

歸巴之勢數日內提臣長齡卽先率同總兵孫清元帶兵向房境東南進擊正可將各股零匪逼歸一路併力剿辦奏入

上命軍機大臣傳諭吳熊光曰蒲添寶被官兵截剿匿入老林滾崖跌斃昨日已據德楞泰由六百里加緊奏到矣現在楚省餘匪無多正可乘得勝之師上緊分路搜捕俾全境早就廓清所有一切糧



運事宜係該督等專責務須督飭局員源源供運  
以期速蒞大功爲要

二十八日

丙寅

惠齡奏言連日接據探報總兵楊

芳前派搜捕苟逆零匪之守備李官富等在白

羊坪松埡子等處殲斃賊匪十三名生擒鍾元

一名據活賊鍾元供稱此股零匪係苟文明之

叔苟子施及徐先鋒二人帶領現存四十餘人

等語李官富復與千總吳順分路搜尋李官富  
一路於北河老林空屋內搜殺賊匪十五人生  
擒徐昇宗季麻子等五人吳順一路在滴水崖  
搜殺賊匪十四人生擒唐萬林江仕文二名僅  
餘數賊未獲現仍尋蹤追捕千總吳順當追殺  
緊急之際賊用矛回戳左膝受傷落水經鄉勇  
救起仍力疾追賊前進又提督慶成所派都司

張起鰲等在天花山老林追及賊蹤當卽商同副將張瑗分兵夾擊張瑗由左手山梁搶進立斃賊匪十餘人生擒男婦十餘人張起鰲等由右手山梁搶進亦殲斃賊匪十餘人生擒易榮興等十八名餘賊乘夜潛逃處成已由虎豹河一帶督率跟搜又經畧額勒登保督同提督楊遇春分遣兵勇入山搜剿節有斬獲並將苟文

明之弟苟文學生擒各等情又據寧陝團練委  
員應先杰稟報拏獲苟逆夥內矛手譚品富及  
婦女徐高氏二名口現將該犯解廳審辦至前  
窟獨松樹大板岔一帶之張二張三賊股經副  
將吳廷剛帶領兵勇跟蹤搜剿連日在左肱膊  
山梁等處屢次追及賊匪均有斬獲該匪現已  
翻過秦嶺以南向紅廟河一帶奔逸吳廷剛緊

躡前往查刻下東路零匪不過數十人已奔竄  
秦嶺以南距峪口較遠吳廷剛一經逼出老林  
即可殲除淨盡惟西路靳士黃股匪或十數人  
一股或數十人一股亦尚在潞峪一帶山內游  
奕經畧額勒登保已派令楊遇春帶領官兵由  
金雞梁屈家溝自東向西併力搜剿額勒登保  
亦由琵琶嶺兩河向西進發督率辦理誠恐該

匪等被剿緊急竄出澆峪田餘等口輾轉逃避  
刻下情形自以西路爲急臣卽將子午石碣等

峪堵剿機宜諭知游擊劉應魁帶領軍標官兵  
四百名偵探防守一面將前派入山之兵撤出  
子午峪刻卽移營馳赴澆峪一帶設法截剿以  
便額勒登保得以盡力搜捕迅就肅清奏入

上命軍機大臣傳諭惠齡曰此次楊芳張瑗等分投

搜剿俱有斬獲所餘賊匪無多無難迅速辦竣惟  
所稱東路零匪不過數十人一經逼出老林即可  
殲除淨盡其西路斬士黃股匪人數稍多額勒登  
保已派令楊遇春帶兵剿辦額勒登保亦向西進  
發督率辦理並未提及經畧赴楚之語前經節次  
降旨令額勒登保酌帶兵力於八月二十左右由  
鄂陽平利一帶前赴湖北幫同德楞泰搜剿楚匪

嗣因德楞泰奏報已將蒲逆大股剿淨復經諭令  
額勒登保如尙未赴楚卽先將陝境餘匪剿淨再  
赴楚境督同剿辦餘匪奏報蔽功如業已赴楚卽  
不必赴陝並於八月初十日諭知惠齡該督此摺  
係八月初九日拜發豈尙未接奉何以總未聲敘  
額勒登保是否赴楚卽額勒登保未經知會惠齡  
豈有經畧行止總督竟無所聞之理現在額勒登



保如已赴楚所有陝省未經辦竣零匪係惠齡專責必須督同楊遇春等上緊剿淨遇有奏報剿賊情形惠齡應列銜居首卽額勒登保尙在陝省惠齡係本省總督亦不應稍有推諉總當於九月內肅清全境不得再有延玩

惠齡又奏言查

臣

前在額勒登保軍營彼此熟

商安插鄉勇事宜

奏派道員朱勳副將王兆夢總理其事前赴漢南  
妥爲料理茲據該道等稟稱連日將守備孫榮  
原帶鄉勇一百三十二名先行妥辦當將

皇上體念伊等隨征日久現屆大功告竣

賞卹銀兩資送回籍寧家安業緣由剴切宣諭該鄉  
勇等咸以出外日久刻下軍務完竣正想各回  
故土惟慮長途盤費艱難回籍後又無謀生之

計乃蒙

皇上垂念及此深憐小民苦情

賞給銀兩各令還鄉並沿途給予口食如此

天高地厚之恩實在未敢想到等語該鄉勇等踴躍

歡呼同聲感頌隨卽逐加查點其中有情愿在

陝入伍者八名已交寧陝鎮並漢中協撥補兵

糧外實在回籍者計四川鄉勇五十一名西鄉

鄉勇五十三名楚省鄉勇十四名製給凱撤鄉  
勇大旗各派員弁護送並按名封兌賞銀交委  
員攜帶前往沿途飯食棚廠均已先期預備定  
於本月十一日自漢中起身其籍隸留壩鳳縣  
等處鄉勇五名交漢中府差員送交該廳縣妥  
爲安插又籍隸貴州鄉勇一名暫留漢中俟貴  
州官兵凱旋再行送往至該鄉勇等所帶刀矛

詢係自行製備亦經示知如不便攜帶卽給價  
收繳該鄉勇等情愿多得銀兩當卽按件呈繳  
每件給價銀五錢均已全數收回等情

臣

復飛

札該道等此係發令之始尤須慎重飭令該道  
將四川鄉勇親身送往廣元沿途既可照料周  
妥並可將辦理緣由面告川省委員畫一妥辦  
更爲放心一面飛咨四川湖廣督臣派委委員

前赴交界處所接收轉送沿途一體照料妥爲  
女頓以糞各得其所並咨明各該省如有送陝  
鄉勇亦卽照此辦理

同日全保奏言據探報額勒登保已將首逆荷  
文明及犯屬餘匪擒殺淨盡卽欲移師赴楚

臣

與督臣吳熊光先已飛飭各路將軍糧運貯充  
裕至需用餉銀准河南撫臣馬慧裕咨稱兩淮

解豫備撥銀兩現准鹽政咨會於八月初二日  
起分作六批間日起程解到尙需時日查有續  
撥粵餉三十萬兩應解豫歸欵先准兩廣總督  
咨於六月初六初九十二等日分作三批起程  
計期當可行抵楚境請卽就近截留等因查粵  
東解豫歸欵銀三十萬兩已據黃梅縣詳報於  
七月二十及二十三二十六等日交替安徽宿

松縣出境是此項餘銀過楚已遠計期可抵豫

省臣現復飛咨馬慧裕委員徑解襄局交收並

飭藩司在於本省司庫內不拘何項先行借撥  
銀十萬兩分解荆宜兩府收貯備用以期迅速  
戴功仍俟兩淮餉銀解到照數歸欵

同日楊揆奏言竊照督臣勒保自移兵駐劄夔  
州嚴防楚匪闖入並分派鎮將於通南東大開



萬梁大各路搜捕餘匪屢有斬獲嗣據具報有  
青黃藍白等號剿散餘匪約數百人合成一股  
由界嶺竄入雲奉大寧交界之小神堂一帶滋  
擾並探有賊首劉湖選在內經勒保督率遊擊  
羅思舉原任副將褚大榮分路抄襲斃賊甚多  
劉湖選被剿情急復向大寧一帶老林竄去我  
兵跟蹤緊躡追至鞋底山兵再分路抄擊立將

該首逆擒獲所有黃號掌櫃伍金元偽總兵張  
伸先後生致餘匪全數殲除軍營洵爲順利現  
在各路官兵剿辦賊匪多在川東境內而夔州  
一帶尤關緊要除雲萬等處所需軍米飭令各  
該州縣凡遇官兵過境就地供運外臣又於嘉  
定重慶眉州各府州所屬動碾倉穀二萬石由  
水路趕運夔州以資兵食俾不致稍有缺乏均

奏入報

聞